

Seccion Historico

Pa: Dufi Kock, Escritor y Historiador - Lid in de Orde van Oranje
Nassau 2006

Storia di e Forno na Rancho


E forno na Rancho a wordo traha pa Santiago (Papa Chago) Tromp na aña 1892. E ta e unico forno cu a keda Aruba. E ta esun mas cuida den Caribe y un di e famoso monumentonan industrial historico di Aruba.

E forno aki a wordo usa pa traha kalki door di kima piedra of coral (na Ingles limestone). Fornoan sera ta usa menos palo pa kima cu esnan habri. Kalki tabatin varios uso, uno sigur e tempo ey tabata pa blancha cas (cu aloë). E forno aki tin un haltura conico di 6 meter y mei.

E tin un chemene rondo y cortico. E basis (parti abou) tin un forma cuadra cu e hukinan bon acaba. E hanchura di e basis ta mas o menos 23 meter. E murayanan ta traha di piedra y coral y mas o menos 50 meter diki.

Den dje tin e forno. Na un banda tin tres buraco. E persona cu ta cende e forno ta drenta den un buraco (haltura di un persona). Door di un buraco ta cende e forno usando zuurstof. Ora esaki ta cabando por sigui yena mas. Na fin di e proceso e forno mester fria.

Despues e puiro mester wordo geblast. Esaki ta un poco peligroso pa motibo cu e por haci daño na bo curpa of wowo asina cu bo haya contacto cune. E forno aki a wordo usa te na mitad di '20 y na aña 1970 el a wordo restaura.



Monumentenzorg a tum'e over na 1982.

Sr. Clifford Rosa, cu ta dirigi Stichting Rancho

tin plan pa bay restaur'e. Ohala, pasobra e ta algo importante pa nos historia.

Luciana Ras Partera na San Nicolas

Luciana Ras a nace dia 8 di December 1875 (#158) na Aruba, yiu di Venturanso Ras y Victorina Stamper. Luciana tabata un Labado di paña y miho conoci como Ma Chancha. El a casa pa misa cu Dolorus Geerman. Di e matrimonio aki nan a wordo bendiciona cu ocho yiu. Luciana a muri na Aruba dia 16 di juni 1958 (#123). Su tata, Victoranso a muri na Aruba dia 4 di augustus 1877 (#55). Aki ta sigui informacionnan di e yiunan:

Number:	Nace:	Muri:
Esteban	december 27, 1895 (#)	april 10, 1982
Ana Talia	juni 8, 1900 (#117)	juni 17, 2000
Jacobo	februari 7, 1903 (#35)	october 1, 1921
Felipe	mei 27, 1905 (#139)	september 23, 1993
Adela	mei 24, 1907 (#123)	april 22, 1975
Cecilia	november 23, 1909 (#145) bt	mei 25, 1912
Basilio	december 2, 1913 (#8) bt	september 20, 1917
Alisia	september 22, 1917 (#110) bt	november 12, 1996

Segun Christy Kingsale, un famia, ta conta cu fuera cu Ma Chancha tabata un labado di paña, e tabata tambe un Frumun (Partera), Dentista, Labado di morto y haci trabou di dokter, esta pone weso bek na luga of spalk weso cu a kibra.

Mencho Ras, un otro famia, ta conta cu su padushi, Felipe Ras, ta conta cu esun cu bay ranca djente cerca su mama ta haya prome, un mishu di rom pa bebe (un glas di 250ml) como anesthesia.

Ora e rom cuminsa traha e ora e pashent ta pone su cabes stid den un horket cu tin hancra den coredo di zuid. Su Padushi ta wanta e boca/ cachete di e pashent habri. Ma Chancha ta bin cu un pins pa ranca

e djente. Tin biaha cu un sambechi, si ta necesario, pa corta den e carni di djente. Despues di ranca e djente, si ta necesario e pashent ta haya un otro mushi di rom pa calma e dolor. Ami ta corda e cas cu mi padushi y su mama tabata biba. Esey tabata Weg Sero Blanco 27, San Nicolas. Den añanan '60 y '70 e cas tabata di torto. Mencho ta corda cu su padushi tabata usa un fogon den cushina. Fin di decada '70 e cas a wordo reconstrui di blokki. Awo mi ta kere cu ta un acto-acto primo (Tico Kock) ta biba eynan.

Den e documentonan di Luciana ta para "Ongehuwd" pasobra e tabata casa pa misa so, manera tabata sosode hopi antes y no pa raad.

